

Sa nassione chi peldet su donu

O sardu, si ses sardu e si ses bonu,
Semper sa limba tua apas presente
No sias che isciau ubbidiente
Faeddende sa limba 'e su padronu.

Sa nassione chi peldet su donu
De sa limba iscumparit lentamente,
Massimu si che l'essit dae mente
In iscritura che in arrejonu.

Sa limba 'e babbos e de jajos nostros
no l'usades pius nemmancu in domo
prite pobera e ruza la creides.

Si a iscola no che la jughides
Po la difunder menzus, dae como
Sezis dissardizende a fizos bostros.

Remundu Piras

Comune de Sorradile
Provintzia de Aristanis

Sa redatzione de *Novas sorradilesas* est
contivizada dae su Servitziu linguisticu sardu
de su Comune de Sorradile
(*Sotziedade Cooperativa L'ALTRA CULTURA*)

S'isportellu linguìsticu est a dispozitione de
tzitadinos, maistros de iscola, professores,
istudiantes pro cale si siat informatzione, duda,
bibliografia, sitografia in contu de sa limba
sarda, pro consulènzias didàticas e pro
cussizos chi pertocant sas règulas de iscritura
de su sardu.

Su Servitziu est apertu:

su **zòbia** dae sas **08,00** oras a sas **14,00**



Comune de Sorradile
Provintzia de Aristanis

www.comune.sorradile.or.it

Novas sorradilesas

Newsletter periòdica de informatzione
istitutzionale de su Comune de Sorradile

At torrada a abèrrere s'isportellu linguìsticu comunale.

Est torra in atividade s'isportellu linguìsticu de su Comune, unu sinnale de importu de s'Amministrazione comunale a favore de sa limba sarda.

Cun s'isportellu linguìsticu su Comune tenet unu servìtziu pro cale si siat bortadura in sardu: atos e documentos amministrativos, comunicatziones, avisos. Su servìtziu est abertu a sos tzitadinos pro informatziones, cussizos e consulènzias chi pertocant su sardu.

Su progetu, finantziadu dae sa Lege 482 de su 1999 – *Norme in materia di tutela delle minoranza linguistiche*, est istadu presentadu dae 8 biddas paris: Ardaule (capufilera), Bidoni, Busache, Neoneli, Nughedu Santa Vitòria, Samugheo, Sorradile, Ula, comunidades atentadas a su valore culturale e sotziale de sa limba sarda.

www.sardegnaicultura.it

Su portale *sardegnaicultura.it*, cuncordadu dae sa Regione e dedicadu a sos benes culturales de sa Sardigna, tenet totus sas pàginas *web* fintzas in sardu. Si ddue podent lèzere informatziones e notìtzias chi pertocant custos argumentos:

archeologia, teatru,
architettura, tzìnema,
arte, mùsica,
arte nuràgica, traditziones,
crèsias romànicas, festas,
literadura, paesàgiu,
fotografia, cartografia

e de s'istòria de sa Sardigna, dae su perìodu nuràgicu a cussu contemporàneu.

In *LOGOS DE SA CULTURA* si agatant informatziones de bibliotecas, archìvios, museos, monumentos, àreas archeològicas e itineràrios culturale.

De importu mannu sa setzione *LIMBA SARDA* cun sos aprofundimentos dedicados a s'istòria de sa limba sarda, a sas caraterísticas de su sardu, a sa literatura in sardu, a sa normativa e a sas àteras minorias linguìsticas de Itàlia e de Europa. Una biblioteca manna est a disponimentu intrande in su zassu *Literadura*: si ddue atzapant òperas dae su 1400 a su 1900, romanzos e poesias, ditzionàrios e monografias, documentos comente a sos Condaghes e sa Carta de Logu, autores sardos e istrànzos bortados in sardu.

Poesia a bolu est sa parte dedicada a sas garas de poèsia: un'archìviu multimediale cun sa vida de sos cantadores prus connotos, dae sos primos artziados a palcu fintzas a sos prus giòvanos de oe, e s'istòria de sas garas. Faghet fintzas a ascurtare una bintina de garas.

Unu resumu curtzu de sa chirca sotziolinguìstica de sa Regione Sardigna

Dae una chirca sotziolinguìstica, fata dae sa Regione annos a como, dae unu campione de sardos intervistados resurtat chi:

- su 68,4% narat de connòschere e faeddare una variedade de sardu. In sos comunes cun prus pagu de 4000 abitanteras sa pertzentuale àrtziat a su 85,5 % e in sos comunes cun prus de 100.000 abitanteras sa pertzentuale calat a su 57,9%.
- Su 29% cumprendet su sardu ma non ddu faeddat.
- Su 2,7% non ddu faeddat e nemmancu ddu cumprendet.
- Su 89,9% est de acordu cun sa frase “*essende parte de s'identidade nostra, sa limba locale depet èssere sustènnida*”.
- Su 78,6% est a favore de s'insegnamentu de su sardu in iscola.

Ditzos

Carru andande, caminu fainde.

In domo de su ferreri sazos de linna.